



14. agusti 2026

UKA2026/250

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kalaallit Nunaanni najugallit ullumikkut aammalu siunissami aatsitassarsiorfinni sulilernissaat anguniarlugu piginnaangorsaanissamut tigussaasumik pilersaarusiortoqarnissaanik suliaqartoqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut. Pilersaarusiaq tigussaasumik ilinniarnernup ingerlarnganik, allagartanik pissarsiffiusunik pikkorissarnernik, ilinniaqqinnissamut neqeroorutininik aammalu Naalakkersuisut, kommunit, Majoriaq, inuussutissarsiornermik ilinniarsiit attumaasutillit kiisalu aatsitassarsiortut akornanni suleqatigiinermut ilusissamik ilaatigut tikkuussissaaq. Pilersaarusiaq Inatsisartunut UPA 2027 nallertinnagu agguanneqassaaq.

(Inatsiartunut Ilaasortaq Hans-Erik Enoksen, Demokraatit)

Tunngavilersuut:

Kalaallit Nunaata kujataani aatsitassarsiornerit arlallit ingerlanneqanngikkunik aallartisarneqarput, nunattalu immikkoortortaani nutaanik ataavartunillu ineriartornissamut periarfissanik pisariaqartitsiffiusuni taakku suliffeqarfinnik nutaanik pilersitsisinnaapput, suliaqartitsisinnaapput aammalu aningaarsarsiornermik ineriartortitsisinnaallutik. Periarfissalli nammineerlutik najugaqartunut iluaqutaalernaviangillat.

Ilumoorinnaangilaq Kujataani aatsitassarsiorfiit pilersiorterneqartuni kalaallit nunat allaneersut sulisut isiginnaaginnassagaat, inuiaqatigiittut piffissaq eqqorlugu piginnaangorsaanissatsinnut, pikkorissaanissatsinnut aammalu uppersaatinik allagartaartitsinissatsinnut piareersarmannginnerput peqqutigalugu. Demokraatit isumaqarput, aatsitassarsiornermi ineriartorneq najukkani malugineqarsinnaasumik naleqalersitsissasut. Nunatta karsianut isertitassat kisimik pineqanngillat. Suliffissat, ilinniartitaaneq, piginnaangorsaanerit aammalu piffinni ineriartortitsiffiusuni najugallit siunissamut upperinninnissaat pineqarput.

Assersuutigalugu Nanortalimmi eqqaanilu nunaqarfiit ineriartornermit sunnigaasinnaapput. Piffik pineqartumi ukiorpassuarni suliffissaaleqinerup, nuttarnernup aammalu inuussutissarsiornermi periarfissat killeqarneri kingunerluutaat malugineqarput. Taamaattumik aalajangiisuulluinnarpoq aatsitassarsiornermi suliniutit nutaat piffinni najugaqartunit inuttalersorneqarnissaat.

Ileqqorissaarnermik aammalu politikikkut pisussaaffeqarpugut qulakkiissallugu innuttaasut aatsitassarsiornermi suliniutini sulilersinnaanissaanut ilumut periarfissinneqarnissaannut periarfissiissalluta. Taamaattumik pisariaqartinneqarput tigussaasumik pilersaarusiortoqarnissaanut, piginnaasat suut pisariaqartinneqarnerinik, pikkorissaanerit suut neqeroorutigineqassanerinik, kikkut akisussaasuunerinik aammalu suliniutit qanoq piviusunngortissinnaanerinik ersarissarlugit nassuiaasorsorlugit.

Pilersaarusiaq ilaatigut ukuninnga imaqartariaqarpoq:

- Piginnaasat allagartallu aatsitassarsiortuniit piumaneqarsinnaasutut naatsorsuutigineqarsinnaasut



nalunaarsorneri.

- Pikkorissarnerit ingerlarngi ilinniaqqinnissamullu neqeroorutit innuttaasunut tulluarsakkat pillugit siunnersuutit.
- Majoriaq, inuussutissarsiornermik ilinniarfiit ilinniarfiillu allat attuumassuteqartut qanoq peqataatinneqarsinnaanerannik nalilersuineq
- Naalakkersuisut, kommunit aammalu aatsitassarsiortut akornanni suleqatigiinnissamut ilusissaq
- Innuttaasut inersimasut ilinniarsimanngitsut imaluunniit ilinniartinneqarnissamik pisariaqartitsisut sulilersinnaanissaannut ikiorserneqarnissaannut pilersaarut.

Anguniagaasariaqarpoq suliffissat sapinngisaaq tamaat najugaqartunit inuttalersorneqarnissaat.

Tamanna ilaqutariit aningaasaqarnerannut, najukkami naleqalersitsinermut aammalu nammanneqarsinnaasumik ineriartortitsinermut nukittorsaassaaq. Ilutigalugu najugalinnik sulisoqarneq aatsitassarsiortunut iluaqutaassaaq, peqqutigalugu najugalinnik sulisussarsiorneq ajornannginnerussammat aammalu najukkani inuiaqatigiit akornanni piginneqataatitsinermik pilersitsissammat.

Demokraatit isumaqarput piffissanngortoq isummat pitsaasut eqqartuinnarnagit tigussaasunik iliuseqartariaqalersugut. Qulakkeerniarutsigu aatsitassarsiornermi ineriartorneq inuiaqatigiit iluaqutigssagaat, taava inuiaqatigiit ineriartorneq peqataatinneqarnissaannut piginnaasat pisariaqartitaat qulakkeerniarnissaat aallartittariaqarparput.

Neriuutigarpugut siunnersuut Naalakkersuisuniit Inatsisartunilu partiiniit tapersersorneqarumaartoq.

Pisortanut aningaasatigut allaffissornikkullu kingunerisassai

Pilersaarusiornermut atatillugu aningaasartuuteqassaaq. Taakkua ilinniagartuut ukiumut sulinerat 500.000 koruuniusut qaangissanngikkaat naatsorsuutigineqarpoq.

Namminersortunut aningaasatigut allaffissornikkullu kingunerisassai

Pilersaarusiornermut atatillugu kingunissaqanngilaq.

Innuttaasunut aningaasatigut allaffissornikkullu kingunerisassai

Pilersaarusiornermut atatillugu kingunissaqanngilaq.